

Inuinnaat nunamik siunissami piginnittussaalernissaata eqqunneqarnissaa pillugu apeqquteqaat aallaavigalugu oqallinnissamik siunnersuut.

(Inatsisartunut ilaasorta q Justus Hansen, Demokraatit)

Akissuteqaat

(Naalakkersuisut Siulittaasuat, kiisalu Nunanut allanut tunngasunut Naalakkersuisoq)

Aallarniutigalugu Naalakkersuisunit Inatsisartunut ilaasorta q Justus Hansen soqutiginarumik oqallittoqarnissaanik saqqummiussineranut qutsateqarfignissavarput.

Siunnersuuteqartoq isumaqatigaarput, tassalu apeqqut tunngaviumik inatsisiliornissamik ataatsimiititaliarpuq suliaasa ilagissaga. Naalakkersuisunit sulinissaq tamanna sioqqutisumik inerniliiffigerusunnigilarput, naatsorsuutigineqarsinnaavorli nunamut piginnittuusinnaanermut tunngasumik suliaqarnermi taamatut allannguisoqassagalarpat tamatuma inuiaqatigiinnut sunniuteqarsinnaanera ilanngullugu eqqarsaatersuutigineqassasoq. Nunarsuatsinni kitaamiusut taaneqartartut ukiuni untritilikkaani inutut ataasiakkaarlutik nunaminertanik piginnittuusinnaatitaasimapput. Tamannali nunatsinni manna tikillugu atuutsinneqarsimangilaq. Nunatsinni nunap tunniussinnaasai nalilittut isigaavut nunarsuattali kitaamiuisa nuna immi naleqartutut isigalugu. Taamaattumik inuttut ataasiakkaatut nunamik piginnittuusinnaaneq nunatsinni atuutisilissagalarutsigu tamanna allarpassuartigut sunniuteqartussaavoq, assersuutigalugu aatsitassarsiornermut tunngasut eqqaaginnaraanniluunniit. Ullumikkut aatsitassarsiorlut paaasinnaanermut piginnaatinneqartarput, nunamilli piginnittuusinnaaneq eqqunneqassagalarpat tamatuma kinguneranik aamma nunap pisuussutaanut piginnittuulersinnaaneq ilanngulluni atuutisilissagalarpoq.

Inuinnartut nunamik piginnittussaataaneq tamakkiisumik ataqineqartussaataavoq. Tamanna Tunngaviumik inatsimmi § 73-imi aalajangersarneqarsimavoq. Kinaluunniit pinngitsaalineqarsinnaangilaq pigisaminik tunniussinissamut arsaarinninnerli aatsaat pisinnaavoq kikkut tamat nalinginnaasumik pisariaqartitsinerisa inatsisikkut piunasaqaatigippassuk tamakkiilluinnartumillu taarsiiviginnittoqarpat. Taamatulli oqaraanni imaangilaq nunamut piginnittuusinnaaneq inuit pisinnaatitaaffiannut ilaasoq.

Nunatsinni nunap atorneqarnera Inatsisartut Pilersaarusiorneq aamma nunaminertat atorneqartarnerat pillugit Inatsisaat naapertorlugu aqunneqarpoq. Inatsit taanna naapertorlugu nunaminertaq taamaallaat atorneqalersinnaavoq nunaminertat pillugit oqartussaasumit akuersissuteqartoqarsimappat. Taamatut nunaminertamik atugassinneqarneq inummut tunngasuuvoq, nunaminertallu pillugit oqartussaasumit akuersissuteqarani tunniunneqarsinnaanani. Taamatut nunaminertamut atuisinnaatitaaneq pisarineqarsinnaangilaq, tuniniarneqarsinnaangilaq qularnaveeqqutigineqarsinnaanilu. Nunaminertamulli annertuumik nalilinnik pilersuisoqarsimappat nalillit tamakku pisarineqarsinnaallutillu tuniniarneqarsinnaapput nunaminertamullu pineqartumut nutaatut piginnittuulersoq salliutinneqarnissamut piginnaatitaaffeqalissalluni. Inatsisartut inatsisaata siunertaraa qulakkiissallugu nunaminertat atorneqalersinnaassasut inuiaqatigiinnut tamakkiisumik nalilersuineq tunngavigalugu.

Pinngitsaaliissummik taarsiinertalimmik arsaarinnissuteqartarnermut illersorneqarneq pilersaarusiorneq aamma nunaminertat atorineqartarnerat pillugit Inatsisartut inatsisaata aamma ilagaa. Taamaasilluni takuneqarsinnaavoq, ilaatigut kikkunnut tamanut iluaqutaasumik nalinginnaasumik pisariaqartitsisoqarpat, nunaminertamik atugassanngortinneqarsimasumik pinngitsaaliissummik taarsiinertalimmik arsaarinnissuteqarniarneq aallartinneqarsinnaasoq, tamannali pisassaaq pinngitsaaliissummik taarsiinertalimmik arsaarinnissuteqartarneq pillugu Inatsisartut inatsisaanni malittarisassat naapertorlugit imaluunniit pinngitsaaliissummik taarsiinertalimmik arsaarinnissuteqartarnerup atorineqarnera pillugu Kalaallit Nunaannut inatsit naapertorlugu.

Nunaminertamik atugassanngortitsinermi taamaallaat suliap suliarineqarnerani akitsuummik akileeqqusiisoqarsinnaavoq nunaminertamik atugassinneqarnissamik qinnuteqarnermut atatillugu tamanali nunaminertamik attartornertut isigineqassanngilaq, piginnaatitaaffilli tassaalluni ataasiaannarlugu piffissami killilerneqanngitsumi tunniunneqartartoq inummut aalajangersimasumut siunertamullu aalajangersimasumut.

Nunaminertanik atugassanngortitseriaatsit allanngortinneqarneri soorunami allarpassuartigut annertuunik allanngortitsinerneq kinguneqassapput, taakkununga ilanngullugu akileraartarnerup tungaatigut.

Naggasiullugu erseqqissaatigerusuppara pineqartumi matumani kinaassutsikkut kulturikkullu tunngavigut kallarneqarmata. Naggueqatigiit Inuit nunaminertanik ataasiakkaarlutik piginnittuuneq ileqqorinngilaat. Nuna mikisualunngorlugu agguarneqarsinnaanngilaq soorlu imaq silaannarlu aamma taama pissuseqartut.

Tamatumani inuiattut qangaaniit eqqarsartaaseqarnerput tunngaviuvoq, tassalu nuna, imaq silaannarlu pigineqarsinnaanngitsut, inuillu nunarsuarmi tikeraatut isigineqartariaqartut. Tassa silaannaq, imaq nunalu inunnit ataasiakkaanit pigineqarsinnaanngillat.

Eqqarsaatersuutit tamakku inuit ataasiakkaat nunamik piginnittuusinnaalersinnaanerat pillugu oqallinnermi ilannguteqqunaqaat.

Nunarsuup kitaani pissutsit assilillugit aqqissuussissanerluta imaluunniit qangaaniit aqqissuussineq toqqammavigisarput attatiinnassanerlugu eqqartussavarput.

Taamatut oqaaseqarlunga oqallinnissamut soqutiginarumut qilanaarpunga.